

## ❖ GWEDDI DYDD NADOLIG

Cyn agor y parselau,  
cyn datod y rhubanau,  
y gras, O Arglwydd, dyro im  
i gofio'r rhai na chawsant ddim.

Cyn edrych ar y cardiau  
a chofio am ein ffrindiau,  
O dwg i'm cof trwy'r cofio i gyd  
fod rhai heb gyfaill yn y byd.

Cyn eistedd wrth y byrddau  
a gwledda ar dy ddoniau,  
rho i mi gofio, Arglwydd Dduw,  
y rhai heb fwyd i'w cadw'n fyw.

Yng nghanol fy nghyfeillion  
a miri'r cwmni rhadlon,  
gad i mi gofio am ambell un  
fydd heddiw ar ei ben ei hun.

Wrth ganu ein carolau  
a gwrando ar y clychau,  
rho ras im gofio, dirion Dad,  
y mud a'r byddar yn ein gwlad.

A minnau eto eleni  
yn llon ar ŵyl y Geni,  
gad i mi gofio'r rheini sy  
y diwrnod hwn mewn galar du.

Wrth ddawnsio rownd y goeden  
a'r lliwiau ar bob cangen,  
gad i mi gofio, Iesu hoff,  
fod rhai yn ddall a rhai yn gloff.

Cyn mynd i'r gwely heno,  
O Arglwydd, gad im gofio  
y rhai na chawsant ddim o'r hwyl  
a gefais i ar Ddydd yr Ŵyl.

**Selyf Roberts**